

交河豐德白川延安等地之軍悉屬江華府俾習水戰修明軍律以肅顏綱  
答曰䟽辭當體念而採施焉○遣謝恩使申景禎李行遠等如瀋陽先是遣崔  
鳴吉請寢徵兵而還世子徵兵一事得請而來遂遣景禎謝恩○癸未流星出  
郎位星上入梗河星上○憲府啓曰杞平君俞伯曾之劄設有所失當原其心  
此必是忠戇所激且有所聞於人而信之太過也似無可罪之事請還收罷推  
之命 上不從又啓曰凡儒生被削於青衿錄則不得冠儒冠而赴國試權知  
承文院副正字鄭昌胄青衿之削未解偃然赴試得第已極駭異至於槐院之  
選仕進初程之極選者則其猥濫極矣請鄭昌胄削去仕版承文院行首掌務  
官不有公論乃敢圈點並命從重推考 上從之○兵曹叅議崔惠吉上䟽請  
恕俞伯曾之罪以開言路不報○以林堦為司諫金汝鉦為執義李尚馨為副  
校理李滌為同知經筵○甲申巽方有赤氣三條○備局啓曰淮陽府使權井  
吉曾為春川營將頗得軍心淮陽僻在一隅彌令道內操鍊軍兵勢甚不便春  
川道里居中且與監營相近與春川府使相換稱無防禦使委以兵事庶可得  
力於緩急 從之○乙酉 上晝講詩傳講訖同知經筵金壽賢曰俞伯曾之  
劄可用則用之不可用則置之不宜遽加摧折也 上曰卿右伯曾耶可謂